



Mamata-i Nandigram nungi tokteptsü; TMC-i candidate 291 sangdong



Aaron Finch-i otsü tasen ka yangluogo

VOL. XVIII NO. 141 (ADOK 141) DIMAPUR

KÜPTOKNÜ (SATURDAY)

METSÜREMI (MARCH) 06, 2021

₹ 5.00

Chathe River Bridge (Patkai Bridge) nungi Kukidolong lapoktsür

Dimapur, March 5 (TYO): March 5, 2021 anepdang 5:00 ako nungi nikongdang 5:00 ako tashi Chathe River Bridge (Patkai Bridge) nungi Kukidolong tashi gari ajak senzütsü melaogo, ta Dimapur Deputy Commissioner, Rajesh Soundararajan, IAS-i

metetdaksü. "Iba lenmang nung senzürtem traffic tetuyuba sülen anidaksüla aser garitem tsüingda metre 30 bosa tetsüingda ayutsüla. Iba tesem nung traffic ketdangsürtemi kanga junga mita reprangtsü" ta Dimapur Deputy Commissioner-isa ashi.

COVID-19 Nagaland: Nisung shingad dak meputet; Taneptsü angura maliasü

Kohima, March 5 (TYO): Hokolbarnü Nagaland nung nisung shinga dak-a COVID-19 aliba meputet aser ano taneptsü angur-a maliasü, ta Health & Family Welfare Minister, S Pangnyu Phom-i metetdaksü. Nisung 12,210 nungi parnok 11,951 taneptsü nguogo, ta paisa ashi.

Antigen Test ajanga sample 19,151 tendang" ta paisa ashi. Külen, Hokolbar tashi nung Nagaland nung COVID-19 vaccine dose 41,835 agütsüogo. "Nisung 35,860 nem COVID-19 vaccine dose 41,835 agütsüogo. Nisungtem rongnung teintet rogo 800 aser temang nung timtem aliba arishi küm 45 ser temapur 82 dena lir" ta State Immunization Officer Dr Ritu Thurr-i ashi.

"Tang Nagaland nung nisung 15 anepaludar. COVID-19 puteta alir nisung 91 asüba nungi 10 bo tanga timtem ajanga asü aser nisung 153 tanga state temi ogo" ta Health & Family Welfare Department Director, Dr Denis Hangsing-ia metetdaksü.

"COVID-19 vaccine agir nisung 35,860 nungi frontline workers 24,486 aser healthcare professionals 10,492 nem agütsüogo. Healthcare workers 5,975-ibo tanabuba dose agütsüogo" ta Dr Thurr-isa metetdaksü.

"Nagaland nung COVID-19 alitsü akok ta temolung melemba sample 1,31,491 tendangogo. RT-PCR ajanga sample 74,951, TrueNat ajanga sample 37,369 aser Rapid

"Tanü tashi nung Covid vaccine agir shinga dak temang nung timtem adokba osang mali" ta Dr Thurr-isa shisem.

Nagaland job reservation policy atema 'Working Group' tentet



Kohima, March 5 (TYO): Nagaland nung job reservation policy atema tanü kanga dang tongtipang senden ka amendang state sorkari yangluba policy reprangshimtsü atema working group ka tentetogo.

cabinet committee tenüing nung aden.

Iba senden ya State sorkari Cabinet Sub-Committee on reservation policy ajanga ayonga amen. Iba Cabinet Sub-Committee ya Deputy Chief Minister Yanthungo Patton lenisüba kübok lir.

Külen, Core Committee on Rationalization of Reservation Policy (CCoRoRP), Eastern Nagaland Peoples' Organisation (ENPO), Eastern Naga Students' Federation (ENSF), Eastern Nagaland Gazetted Officers Association (ENSO), Central Nagaland Tribes Council (CNTC), Naga Students' Federation (NSF), Tenyimi Public Organisation (TPO) civil society teloktem aden.

Hokolbarnü Hotel Japfu nung Chief Secretary J Alam menden ser senden amen aser Deputy CM Y Patton, Minister Neiba Kronu, Minister Metsubo Jamir, Minister P Paiwang Konyak, Advisor K T Sukhalu, Advisor Zhaleo Rio aser Advisor Toshi Wungtung nungertem

Senden nungsa Nagaland Public Service Commission nungi teshimtet nübotem aden.

"Asen lanurtem nem mapa agütsüsbaji kanga tongtipang aser iba nung ajak nem kasa maongka agütsütsüla. Iba tangatetba nung sorkar mapa

nung nübo peria maliba kintem atema reservation policy ka inyaka arur" ta tanü Nagaland Deputy Chief Minister Y Patton-i senden nung ashi.

"Sorkari Cabinet Sub-Committee ajanga tang teinyakdak reservation policy meyipa reprangshitsü lemtet aser iba atema sub-committee-i tanü ama telok balala den asüingdangyatsü nüngdak ta ajitet" ta paisa ashi.

"Iba onük den sendaktepa alir ajak jatepa tebilembatem angadanger Reservation policy atema onüktem bendener sorkar dangi abentsü atema iba senden ayonga amener" ta Y Patton-isa metetdaksü.

"Sorkar aser Cabinet Sub-Committee-i tajungtiba agi aser tekaratiba nung tebilemstü khurettem angateteptsü atema inyakba ya Nagaland nung alirtemi pelaa agizüksü imlar" ta paisa shisem.

Ghonda ana ser tesadang ka shi senden amenba sülen Planning & Coordination, Land Revenue and Parliamentary Affairs Minister, Neiba Kronu-i osangbener dang ashiba agi "senden nung sendaktepa alir ajaki Nagaland nung reservation policy atema tebilemba tajung aika lemsatepogo."

(Maneni tapak 10 nung...)

CCoRoRP-i 'forward mesüra backward' melemsatsü ashir NSF-i 'pocket wise reservation policy' aginür

Kohima, March 5 (TYO): Naga nung forward mesüra backward ta kin telemsa melii külemi toktepa tajungertem shimteta sorkar mapa inyadaksütsüla ta Core Committee on Rationalization of Reservation Policy (CCoRoRP)-i tanü metetdaksüogo.

Nung Eastern Naga nung kin 6-i 25%, Chakhesang aser Pochury kintemi 6%, Zeliang 4%, Kiphire nungi Sumi nung 2% aser physically challenged 4% lemsükja lir. Nagaland nung job reservation ji 41% lir aser iba ya India nung timtiba state rongnung ka lir" ta NSF president Ninoto Awomi-i ashi.

Tanü state sorkari ayongba senden nung CCoRoRP tenüing nung Ejanthung Ngullie-i o jembidang "tekaratiba nung reservation quota tajung ka yanglutsüla" ta ashi.

"Eastern Naga nungeri akhangba ama state sorkari 45% job reservation agütsür, Nagaland nung job reservation ji 61% akümtsü. Iba ya kanga dang tamashi inyakim ka asütsü aser iba ajanga toktepa tangatetba samatsütsü aser nübo tajungtem tagidak mali akümtsü" ta paisa metetdaksü.

"Cabinet Sub-committee on Reservation Policy-i jungiunga shisadanga policy tajung ka yanglutsü mepishir" ta paisa ashi.

"NSF-i telok shinga anema tebilemba tamajung mali aser ano job reservation anema menokdaker. Ajisüaka, Naga loktiliba nung takoksa bener arutsüba yangluba policy anema noktaker" ta Ninoto Awomi-i ashi.

Iba mapa metembang tashi sorkar mapa atema advertisement ajak sota ayutsüla ta Core Committee-isa state sorkar dang ashi.

"Nagaland nung backward mesüra forward kintem lemsa lir saka Backward Tribes ta ajaba tesem karbo Forward Tribes ta jateta alirtem dang nungi tajungba

lin. Anungji, kin ka backward mesüra forward ta ajaba ta agientsüla aser ajak ajungtsü atema 'pocket wise reservation policy' nung inyaksüla" ta paisa metetdaksü.

"Külen, takar mesüra sorkar ketdangsür tanurtemi reserved seats agir, anungji temsüa aliba candidate temi dang reservation policy nungi tajangzüik agitsüla" ta NSF president-isa ashi.

"Iba atema telemtetbaji sorkari dang agitsü anungji sendaktepa alir ajak indang tebilembatem agir sorkari policy tajung ka yanglutsü imlar. Iba tebilemstü onük ajanga Nagaland Staff Selection Board (NSSB) mapa küma meinyakteter saka sorkari mapang lateter telemtetba ka agia tekaratiba nung NSSB mapa tenzüksü mepishir" ta Ninoto Awomi-isa metetdaksü.

ENSFASER ENPO-i RESERVATION QUOTA 45% KÜMSTÜTSÜAKHANGER

Eastern Naga Students' Federation (ENSF)-i reservation quota 25% aliba nungi 45% kümtsütsü atema tanü nenshia metetdaksüogo. Külen, Eastern

Nagaland Peoples' Organisation (ENPO)-ia state sorkar dang iba tebilemstü khuret atema olemteper telemtetba ka agitsü shiogo.

"Naga Hills Tuensang Area indang putiotsü nung küm 57 tashi sendoka ayuba sayur aser wadang ajak nung meputep lir. Sorkar department ajak nung mapa shitak magütsüba ajiteta 2015 küm state sorkari Eastern Nagaland nung nem mapa magütsü aruba atema agütsütsü lemtet saka iba nunga sorkari tim mesüli inyak" ta ENSF president Sepili Sangtam-i ashi.

"Onoki 45% job reservation meshiba ya ozüingi melar. Onoki tangar indang nungi agizüka meshirba masü saka onok indang meshirba dang lir. Shitakba agibo maparen ajak nung 50-50 tangatetba nung inyaksüla saka ibaji state ngur küm 58 tashi meinyaki aruogo" ta paisa ashi. ENSF-i akhangba atema state sorkari mapa shitak meinyakra, onoki kechi junger ta bilemdir inyaka aotsü, ta paisa shisem.

Naga nung kasa kümdaksütsü tenzüik saka iba mapa shitak meinyaker ta onoki ajiteta sorkar dang metokmeperitem reprangshimtsü ashi" ta ENPO president T Kekongchim Yimchunger-ia metetdaksü.

NSF aser ENSF tsüingda tebilemba balala lir saka asenoki osangkakettem nung dang toktepra, khuret mekoktettsü. Naga nung külemi mener takhangba onük balala angadanga tebilembatem lemsateptsüla. Reservation policy ya Naga nung ajak kasa akümtsü atema lir saka shitak meinyakra iba nükjidong matongtsü, ta paisa ashi.

"ENSF-i 45% job reservation meshiba ya tim aser temeten lir. State sorkari iba takhangba magizüktetra ENSF jaoker olemteptsüla. Ajisüaka, state sorkar mesüra cabinet sub-committee-i iba onük lemsateptsü atema ENSF mejaoker. Sorkari ola madokra kodaser khuret koktettsü? Külemi mener jembishinüba ajanga khuret ajak kokteteter saka ibaji meinyaker" ta Kekongchim Yimchunger-isa metetdaksü.

BMSCH Kohima nung Employee Appreciation Day amung



Kohima nung March 5, 2021 nü Employee Appreciation Day amungba mapang BMSCH superintendent Aleno aser dangartem tangokba noksa ka yangi angur.

Kohima, Metsüremi/March 05 (TYO): Bright Morning Star Children Home (BMSCH) Kohima ajanga Hokulbarnü Perizie nung Employee Appreciation Day munga liasü.

March ita mezüing Hokulbar ya Employee Appreciation Day lir. Iba tetetzü tesem ajaklen mapa inyaker tushia amshitsüba lir.

BMSCH superintendent Aleno-i iba sentong nung jembiba mapang, "Tanurtem tain kuma, dangartem koma

akumtsübutüsü ta asüba angazüka wadang balala nung shilem agiba atema tenüing tetshitsü aser khuret abenba kaka südaktsüner," ta ashi.

Sorkar nunga süang mesüra sorkar masüba sector nunga süang, mapa inyaker ya tongtipan rongsen ka amai lir, kechiaser parnoki temelenshi lidaktsür aser office arakzüdaktsü, anungji tesüiba mapang inyaker aser tang teinyakdak pur nem tetushi agütsütsü asoshi iba amala

anogomung ya kanga tongtipang lir, ta lai ashi.

BMSCH nung aliba staff tem ya office-i arua paper mapa inyakba kisüing masü saka parnoki subject balala sayuba ajanga tanurtem takum nung kongshir aser alima nung nisung tajung kaka kumdaktsütsü asoshi renemshitsür, ta Aleno-isa ashi.

"Mapa inyaker ka ama nenoki tanur ka takum yangerba nung mapa tajung inyaktsür," ta lai BMSCH staff tem dang ashi.

Kohima district kübok ADC, SDO (C) & EAC den tepila sentong agi

Dimapur, Metsüremi/March 05 (TYO): Mapa yutsür aor Additional Deputy Commissioner Kohima, Lithrongla Tongpi Rutsa; SDO (C), Shaying Sheu aser EAC Kezocha, Vineikho Tetso nung nem akum agüja tepila sentong ka March 5, 2021 nü Deputy Commissioner, Kohima indang Conference Hall nung agia liasü.

District nung maparen balala takok ngua ketdangsüba nung parnoki shilem tajung agiba atema Deputy Commissioner Kohima, Gregory Thejawelie NCS ajanga pelaba metetdaktsü.

Item lenirtemi mapa nungloksüba nung temolung süa inyakba, ken o balala ketdangsüba, elections, lendong timtem dak sendakba maparen aser COVID-19 den raraba nung parnoki tajungtiba nung shilem agiogo aser tanü tetemsü ketdangsürtemi mapa yutsür aor, ta Gregory-i ashi.

Parnoki tajangshibatem jenti aser shisatsü tulu bener tanaben district-i jenjang temaba nung meyipa arutsü teimla lir, aser parnok wadang tasen nung takok angutsü aser anema alitsü sarasademtsür, ta pai ashi.

ADC menden yutsür aolai

tepila o jembiba mapang maparen balala takok ngua inyakba nung shilem agirtem dang pelaba lemsatepa liasü.

Deputy Commissioner Gregory den külemi mapa inyakba ya tajangshiba tulu liasü aser pa dak nungi aika angazükogo, aser itemji bener oa mapa tasen inyaktsü, ta lai ashi.

District atema ni shilem agiba ya tzüym nung tzüjang ka ang asütsü akok saka tangazükba jenti liogo, ta Lithrongla-i ashi.

SDO (C) aser EAC mapa yutsür aor Shaying aser Vineikho natia tepila o jembiba mapang, state yimtiba nung tetemsü aser bendanga agütsüba lenirtem kübok inyakshiba ya maongka lir, ta lemsatep.

Parnok lenmang balala nung ajungshiba, shisa agütsüba aser yariba asoshi pelaba lemsatepa liasü.

Deputy Commissioner Office, Kohima nung inyaker tenüing nung Rakalung-i jembiba mapang, mapa yutsür aor ketdangsürtemi densa balala ketdangsüba ajanga yimya tajung angazükba indang ashi.

Iba sentong nungsa District Task Force on COVID-19, Kohima District ajanga

Phek nung arem arongba aser shikariba nokdang

Dimapur, Metsüremi/March 05 (TYO): Phek district kübok yimtsüing, jila, telok mesüra kijai tapi agi arem arongsü aser arem shiruru shikaritsü memelar, ta Deputy Commissioner Phek,

Razouvolie Dozo, NCS ajanga sangdong ka nung metetdaktsüogo. Iba totuyuba nung aibelenertem ozüing agi melaba ama merenshitsü, ta sangdong ajangasa ashi.

Sakraba aser Pholami yim tsüingta gari mesenzüi alitsü

Dimapur, Metsüremi/March 05 (TYO): Sakraba aser Pholami yim tsüingta chainage 20+000 nungi 20+500 nung March 5, 2021 nü nungi March 31, 2021 tashi aonung 9:00 ako nungi anepdang 5:00 ako tashu gari kata mesenzütsü, ta Deputy Commissioner, Phek, Razouvolie Dozo, NCS ajanga sangdong ka nung ashi.

Phek nungi Pfutsero tsüingta 2-Lane lenmang yangluba maparen tekeratiba nung renemtsü asoshi iba tenokdangba ya agütsür. Anungji pei takum aser rongsen kumzüktsü mechi nüburtemi shia aliba lenmang nung item mapang mesenzüi atatsü ajungshir, ta sangdong ajangasa ashi.

Tuensang DTF for COVID-19 Vaccination senden amen



Dimapur, Metsüremi/March 05 (TYO): Tuensang District Task Force for COVID-19 Vaccination pur senden ka Deputy Commissioner, Tuensang indang Conference Hall nung March 4, 2021 nü mena liasü. Iba sentong nung Kumar Ramnikant IAS Deputy Commissioner & Chairman DTF mendenpuba liasü.

Iba senden nung healthcare worker nem mezüingbuba phase nung COVID-19 mozü agütsüba, tanabuba phasen nung frontline worker aser tasembuba phase nung arishi küm 60 nungi tema aser 45 nungi 59 tsüingta danga tashidak keta alir nem COVID-19 mozü agütsütsü aliba indang jembiba liasü.

DIO Tuensang, Thungchabeni-i COVID-19 mozü agütsüba tensa aser tetsükdaktsü ajuruba indang

osang lemsatep aser COVID 2.0 App benokba indanga rateta shia liasü.

Laisa Covaccine mezüing dose agir alir ajunga dang tanabuba dose ya agitsü ajungshia liasü.

RRT WHO, Dr. Christina Nzani Humstoe ajanga mozü agiba tesemtem semdangba indang osang lemsatepa liasü.

Iba COVID-19 mozü agütsütsü atema awareness campaign kanga tongtipang lir aser yangji arogo, lanur aser NGO temi shilem tulu agitetsü, ta Deputy Commissioner ajanga ashi.

Paisa iba COVID-19 vaccination indang awareness ya pei tetsü oshi nung meyipzuka amshitsü aser tekülem kidanga benoka nüburtem nung angazükdaktsütsü ajungshia liasü.



Managing Director, Nagaland Handloom & Handicraft Development Corporation, Zakabo V Rotokha-i Hokulbarnü Urban Haat, Dimapur nung National Handloom Expo semzüktsüba mapang tangokba noksa nung angur. Iba sentong ya Directorate of Handloom & Textiles, Govt of Assam ajanga ayongzük aser Office of the Development Commissioner for Handloom, Ministry of Textiles ajanga sponsor asü. Iba anogo 15 agitsü aliba expo nung Assam, Manipur aser Nagaland nungi shilem agir.



Hombarnü Prime Minister Narendra Modi-i Assam kübok Dhemaji district nung Silapathar nungi online ajanga Rs 3,000 crore alangba totzü mapatongtem lapoktsüdang agiba noksa angur. Iba sentong nungsa PM Modi-i Dhemaji Engineering College lapoktsü aser Sualkuchi Engineering College yanglutsü atema lung azüngtsü. (Silapathar, February 22)

Prafulla Mahanta nem party ticket magütsüba sülen Congress den tongteprateper

Guwahati, March 5 Mahanta nem ticket magütsür aser iba jagi tang pai Asom Gana Parishad (Pragatishil) shia arudaktsütsü meranger. AGP(P)-i constituency 15 nung tokteptsü ta osang angazüker.

"AGP-i kü nem Barhampur Constituency nungi tokteptsü atema ticket magütsüra ni AGP (P) nungi tokteptsü" ta Mahanta-i shiogo.

Osang angazükba agi Barhampur nungi BJP candidate ka tokteptsü. Iba tesem ya Nowgong Lok Sabha Constituency kübok dena lir.

Assam nung bendangertem meindoktsü atema inyakba mapa nung Mahanta-i tongti shilem agiogo. BJP-i aniba sorkari Citizenship Amendment Act yangluba anema pai jembi.

Assam nung lungkak aitba

sülen 1985 küm Assam Accord nung sign sütep aser AGP tentet.

Barhampur menden nungi BJP-i taoba chief minister Prafulla Kumar Mahanta tokteptsü memolunger saka AGP (P)-i Asom Gana Parishad (AGP) anema tokteptsü.

AGP(P)-i menden 10 nung candidate tokteptsü renemer aser item mendenji 1985 nungi AGP ket nung dang lia arur. Mahanta-i Barhampur aser Kaliabor nungi tokteptsü ama lir.

Tezpur nungi MLA Brindaban Goswami ya AGP lennir tongtipang ka lir saka taküm assembly election atema pa nema ticket magütsür. Iba jagi pai Mahanta'er AGP (P) nung adentsü akok ta bilemer.

Arem shiti tepsetba atema küm 3 tepuokdak ayutsü

Tamulpur, March 5 (Agencies): Assam kübok Baksa district & sessions Court-i otsüsütsüsa obendang agütsüogo.

Arem shiti ka light agi puseta südaktsüba atema okadaki pa küm3 ser ita 3 tepuokdak ayutsü tetuyuba agütsüogo.

Iba nisung ya Ranjan Singh lir aser shiti tetsü ka tepsetba atema pa aitsü.

"Ranjan Singh-i ozüing alema mapa inyakba ajanga shiti tetsüji asü. Iba jagi pa küm asem ser ita asem atema tepuokdak ayutsü aser Rs 10,000 senchi achitsü" ta March 3, 2021 nü

okadaki metetdaksü. "Aayanger sensakeri par alu nung arem shiti nungi tsünüsenbongtsü kümzüka ayutsü atema iba mapa ya inyak" ta okadaki ashi.

August 28, 2018 nü Tamulpur nung Ranjan Singh'er alu nung shiti tetsüji sür lia angu.

Iba shiti asüba atema bushisingdanga aodang aser post-mortem agiba ajanga shitiji light agi puseta kuli ngutet.

Ranjan Singh-i par alu meketa live GI wires ayuba nung shitiji puset.

Manas National Park & Tiger Reserve director Sanatan

Deka-i iba obendang pelashishia agizükogo.

Tai maketba arem shiti ka tepseter aitsüba atema obendanger dang pelar aser tarutsü anogotem nunga arem shiti electrocution asürtem kasa merenshitsuila ta Deka-isa metetdaksü.

"Forest ketdangsürtemi mapang shitak nung mapa meinyakba ajanga arem shititem light agi puseta atema kecha mashir. Ano, tai tongloktsür timbaka sensakertem asüba agi ozüing tesashi agi memerenshir, saka iba amaji masütsüla" ta paisa ashi.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Ajma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **Kabiraj H. Umar Chesam** contact no. 7627917983 / 7627998690 Address: 1. Burma Camp, Police point, 2) near Nagaland Gate tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - Taliyimba , Add: Chumukedima



Union Minister Javadekar-i Manipuri Cinema benjung nung adentsü

Imphal, March 5 (Agencies): April 9, 2021 nü Union Minister of Information & Broadcasting Prakash Javadekar-i Manipuri Cinema indang Golden Jubilee sentong lapoktsütsü.

April 9, 1972 nü Manipuri feature film mezüngbuba Mataamgi Manipur saya aser iba sülen Manipuri Cinema taküm küm 50 abensatsü.

Iba benjung atema Manipur State Film Development Society (MSFDS)-i Rs 5.23 crore shi endoka küm piyong sentong balala agitsü renema lir. "Chief Minister, N Biren

Singh-i Union I&B minister den ajurutepa sentong indang lemsatep aser senotsü teyari meshi" ta Society secretary, Sunzu B-i ashi.

Iba mapang Biren Singh-i Union Minister Prakash Javadekar dang MSFDS complex nung sentong agiba nung tongti tesemdanger ka asütsü jaok.

Golden Jubilee Celebration benjung atema züngsem 17 agi akümba organising committee ka tenteta lir aser parnoki Manipur nung film production ajungkettsü atema sentong balala renema lir.

Mizoram BJP lennir ka Mizo National Front nung aden



Kamalanagar, March 5 (Agencies): Mizoram kübok Chakma Autonomous District Council nung Bharatiya Janata Party (BJP)-i takoksa tulu ka ajuruogo.

Kamalanagar nung BJP General Secretary Dangu Prityrup-i anir züngsem noklang aikati Chakma Mizo National Front (MNF) nung aden.

Dangu Rasik Mohan Chakma, CEM, CADC, councillors aser party züngsemtem lia MNF-i Dangu Prityrup Chakma pelaa agizük.

Chakma-i 2018 küm CADC General election nung BJP

ticket amer toktep. "CEM Rasik Mohan Chakma aser pai aniba teloki Chakma Autonomous District Council nung MNF party atema terenlok aika ngudar" ta Chakma-i ashi.

Mizoram nung BJP-i tamakok aika anguba ajanga Prityrup Chakma-i BJP MLA Dr Buddha Dhan Chakma-i BJP toktsü.

BJP-i Chakma Autonomous District Council nung tashimait akümer kechiyong party lennir aikati BJP toktsür MNF nung adener. Ano, party züngsem aikati MNF nung adentsü imlar.

Meghalaya Cabinet-i GHADC election athir

Shillong, March 5 (Agencies): Meghalaya Cabinet-i Garo Hills Autonomous District Council (GHADC) election athitsü telemtetba agiogo.

Chief minister Conrad K Sangma-i anir Meghalaya Cabinet senden ka amendang iba ya lemtet.

GHADC election ya April 9, 2021 nü agitsüba liasü saka Assam Assembly election 2021 ajanga athir.

Assam Assembly election ya March 27, April 1 aser April 6, 2021 anogotem agitsü.

Goalpara aser Kamrup Rural district tem dena Lower Assam nung April 6, 2021 nü polling asütsü. Item district ya Meghalaya den arrtsüa lir.

"April 6, 2021 nü Assam Assembly Elections 2021 shilem tasembuba agitsü aliba agi Cabinet-i GHADC General Election April 9 nü masü saka April 12 nungang agitsü thinenogo" ta Meghalaya chief minister Conrad Sangma-i metetdaksü.

Meghalaya Cabinet-isa Meghalaya nung ozüing alema mapa inyakertemi tepsetba mesüra lemtatsürttem nem sen teyari agütsütsü scheme ka agizükogo.

Iba scheme ajanga Meghalaya nung iba ama lendong nung asür kibong nem Rs. 2 lakh agütsütsü aser temang lemtar nem Rs 1 lakh agütsütsü.



Mizoram chief minister Zoramthanga-i COVID19 vaccine agidang tangokba noksa angur. Yashi CM Zoramthanga den deputy chief minister Tawnluia dena MLA 14-i vaccine agiogo. (Aizawl, March 5)



TIR YIMYIM YIMOBILEM (EDITORIAL)

DIMAPUR KÜPTOKNÜ, METSÜREMI (MARCH) 06, 2021

Power agi meperir

Nagaland ya tangar state ama jungjunga renloka tajungba kümner saka merenloker aser tajungba makümer ta asüba timtemji asenoki electric power masü, political power angutsü asoshiang temulung tagütsüba agüja inyakba ajanga lir. Tangar asoshibo political power ya nübortem asoshi electric power dang masü saka economic power ajak bushiteta nübortem taküm aser rongsen jenjang tashi itdaksüba mapa aser hadir ka lir, saka asenok asoshibo political power ya kenyongi balaka nung amshir, iba jagi tang Nagaland kümner külen küm 60 buba tashi nunga, jenjang dalang agi electric power peria agüja industry tapu balala lapoka aotsüabajibo yutsür, kidang kaketshirtem lesson bushitsü asoshia light tesangwa dena peria magütsütetter. Ibayongji, tanü Nagaland nung kaketshirtem aika asoshi tesangwa angudakji anü aser ita dang lir. Iba ama sensak aser timtem tia nungi Nagaland anitetsü asoshi tang Association of Power Engineers Nagaland (APEN) teloki tezüluba nung taruba küm 20 tashi nungbo mapa küma inyaktetsüsa sentong yanglua bener arubaji, kanga shiranga alidang mozü tajung ka bushiteta bener arua agütsü amai asütsü. Aji oda, political power nung alirtemi APEN-i renema bener aruba electric power sentongji angateta agizüktetra, atangji kopi melii asen lima nung electric light aoba aser light maruba indang mejemtsüsa anogo arutsü. Joko, Northeast nunga tangar state-tembo electric light asüyonga, chiyongtsü asüyonga pei peri akatsü indang masü saka pei peria agir külen tangar dang ayoktsüba indang bilema inyaker. Ajisüaka, asenok jenjang reprangdangra, tang asenoki agiba electric power yaa noklang nung shilem 90 bo tangar dang alia agir. Asenok alima tilaka nung government mapa nung ita sen tilala chia alitsü atema appointment, promotion, transfer aser posting mapatem nung asen akaba political power ajak amshimadoker, electric power aser economic power mengutet tang tashi asenok tangar kübok alir. Asenok kar kidang generator akaba agi light ao memetet tuluka ama bilema alir, saka iba generator power jagi asen lima aser nübortem yimjung nung süngjema melitetsü. Atangji, asen lima nunga Doyang Hydro power project tuluka lir saka ibaji asenok meyong masü North Eastern Electric Power Corporation Limited (NEEPCO) meyong, anungji parnok dang nungiang alia agir. Iba denji Electrical Engineer-temi ashiba ama, asen lima nunga tzü tashi ajanga adokba hydro electric power perir anünga adoktetsüsa Dikhu, Tizü, Doyang, Zungki aser Yangnyu ayongtem lir, saka item Tsüngremi agütsüba temoatsütem ya tagitsü küma asenoki mamshitetter. Asenok ya takar chir ser nung azümasen aser pei agitsü dang metetba agi leni mao timtema alir ama, alimabo takar saka asenok sensaker ta timtema alir. Iba tia nungi asenoksasa asenoki salatetsüla. Iba ama leni mao timtema tia nungi adoktetsü asoshi APEN-i teyuba lenmang kaji, Nagaland nung electric power department ya state government kübok tang amai department ka ser maotsüla saka tanga state-tem nung ama Power Development Corporation tenteta Company Act kübok züngoktsüla. Aji oda, APEN-i ashiba ama, kodang Power department ya political power agi kangabo matsüshitsüsa Private company mesüra Corporation küma yokdir, idangji dang ketdangsertema kibur kümtektümteta terata melii nendaka inyaksü. Tanü putu ya joko computer amshia ita petinu nung raratsüba putu lir, item ajakji alima nung electric power ajanga inyaksü. Iba ama putu ka nung, asenoki tuluka bilemaka, Assam nung nisung kati light switch off sütsü nung, Nagaland nung light maruba agi asenok süngo molua mejemtettsüsaba tia nung alitsüabajibo kanga shisabolutsüka lir. Aji oda, Nagaland tajungba küma yanglushitsü bilemra, tang APEN teloki bener aruba mangdangji memenui asangsang nung mapa küma inyak tenzüktsüla.

OLEMSABANG

AROGO-I TERENLOK MAPA NUNG RANGLOKDANG TONGTIPANG WADANG KAR SENZÜKA TOKTSÜR

~ L. Kika Pongener

Arogo renloka ainba ta kodang südir, asenok aikati arogo nutsüng yongsük renlokba, küm shia arogo nung tzüsenba züngsem talila aika bendenloka renloka aoba ta ashitsü akok. Mesüra Tenlaki tuluba nisung merijang aika amentsüsa yanglur kulemba dang arogo renloka ainba ta karibo ashitsü akok. Ano karibo, arogo renloka ainbaji, arogo senbong ulushiba, tetezü küm tepiyong nung tershilem/tepela/temoatsü/teka molok tenla sen merijang/lakh aika tali-tali arua arogo senbong melem-melema ulua akümba tang arogo renloka ainba ta-ka ashitsü akok. Ano karibo itum dakji alaker, arogo meyong gari tajung alia ayuba/amshiba, ali-kimong jenti alidena ayuba, ki-o-jen tulu tajung aika yangluba...Office Building, Quest House, School/College/Hostel lapoka terenlok mapa (development works) ainaka inyakba, yamala dangji arogo renloka ainba ta ashitsü akok. Hau, item ajungaji alima nung nisunger taküm libaliro nung anisungzük asoshi nungdakba rongsentem lir.

Ajisüaka, itum alima terenlok mapatem, alima rongsen aser alima nung nungdakba osettsüsettem ainaka renlokba dangji arogo ka renloka ainba ta-bo meshitetsü. Yisu-i pa alima nung lia, Tebui nungloktsüba tenyaba mapa tembanga inyaker külen, tatemsa pa kodaki atutsü mapang, arogo nem nungloktsüba mapa tongtipangbaji "Nenoki oang aser kin ajak nutsüngtem kümdakjang, Tebu, Techir aser Tanela Temeshi tenung nung parnok baptijang"(Mathi-28:19; Mark-16:15; Luke-24:47). Yisu-i arogo nem aser pa dak amangertem nem teinyaksü nungloktsüba mapa tongtipangbaji aji asütsü. Yisu-i arogo nem tongtipang sua nungloktsüabajibo, Yisu Khrista osangtajung kodanga mangashidang, tammang tia nung alirtem, Yisu Khrista osangtajung agibo tonger sernung magizüktettertem, Yisu Khrista osangtajung indang angashir sernung temulung memeyipertem, itum amala sama-a aliba tanelatem anir arutsüba mapaji kanga dang tongtipang sua nungloktsü ta angateter. Atangji arogo ka tongtipang teinyaksü mapaji iba tenyaba (mission) mapa, aser tanela anir aruba (soul winning) mapaji asütsü. Anungji arogo ka renloka ainbaji alima terenlok mapatem nung renlokbaji masü, saka tenyaba mapa aser tanela anir aruba mapa kodaka inyaker (?) ta asüabajibo dang kanga tongtipangba asütsü.

Asenoki tanü arogotem nung rongsen teimba indokbaji, koba amala lenmang nungsa indoker ta jungjunga bushidangra, arogo teimba ka nung arogo rongsen teimba indokbaji arogo terenlok mapa inyakyim (development works) nung kanga teimba indoker. Arogo aika nung küm shia arogo 'Project' lakh-sa lakh jenjang, oda arogo tulu kar nungbo crore junga jenjang mekazüka yur inyakteper. Ano kanga dang tesusatsüka, arogo kar nungbo arogo rongsen ketdangsuba inyakyimji jungjunga asadanga reprangdangra, arogo rongsenji benjong-bentsü, longso-longben, chidiyungdi mapatem, alima shi pelatsüba mapatem nung arogo rongsen budget teimba renemba angutsü. Atangji, iba ama mapatem nung arogo rongsen endoktsüabajibo Tsüngrem tsüngdang sentsüh tulu asütsü ta metetdi. Ajisüaka, tanela anir aruba mapa (soul winning) nungbo kanga dang ajema indokba, tanü arogo teimba ka nung angutsü.

(Maneni asüng adok nung.)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bangladesh nung Forest Department-i Tenla ki ka raksatsü



February 25, 2021 nü Bangladesh kübok Bandarban district nung Forest Department-i raksatsüba Seventh-day Adventist Arogo Tenla ki tesem nung Bangladesh Tripura Christian Youth Fellowship züngsem tangokba noksa nung angur.

March 05, 2021: Bangladesh nung Forest Department-i Sathiram Tripura yimdak Protestant Arogo Tenla ki ka raksatsüba atema linük nung Khristantemi aitsü. Iba Arogo Tenla kiji tang teyangludak liasü.

Christian indigenous Tripura nung züngsem, Adhirang Tripura-i, Sathiram Tripura yimdak Khristantem kanga mepelar, aser Khristantemi Forest Department nung ketdangsertem dang temenok agüjang ta akhanger, ta ashi.

Khristantemi Forest Reserve aliji ozüng alema atsünga agi, ta Khristantem nem tai tonglokja Forest ketdangsertemi Tenla kiji raksaja liasü.

February 25, 2021 nü Forest ketdangsertem den Muslim

nunger 8-10 shii Bandarban district kübok Alikadam nung aliba Seventh-day Adventist Arogo Tenla kiji raksatsü, ta Baptist Khristan aser local union council nung züngsem, Adhirang-i metetdaksü.

Osangbener den jembidang Adhirang-i, "Forest Reserve nung iba Tenla kiji yangluba agi Tenla ki bendoktsü ta ketdangsertemi ashi. Sürabangla kechiba ozüng alema süngdong jenti alenba aser ayong nungi long bendenba mapatembo maneni inyaker? Minority ka ama onoki ozü tamangba yimsü mebenshitsü asü?" ta asüngdang.

Bidhymoni Tripura aser Sathiram Tripura yimdak Baptist Arogo (Seventh-day

Adventist Church) nungji Tripura Khristan 160 shi lir.

Osangbener den jembidang putiri, "Iba tatalokba atema onoki shisabulur. Yangi onoka Arogotem lir aser iba ya tatishitsü tamajung ka lir. Onoki iba tatalokba atema ochi temeden aginer aser sorkari Seventh-day Adventists Arogo nem temenok agütsüta ta onoki amanger," ta metetdaksü.

1906 küm Bangladesh nung Seventh-day Adventist Arogo tenzüka liasü. Arogoi linük tesem aika nung schools, colleges aser orphanages lapoka nüburtem tenzüker. Bangladesh nung nütsüng timbaka Catholic Khristantem lir aser nisung million 160 aliba linük nung Khristan nütsüngbo shilem kata majung.

Arogoi longjemer Ireland nung Euthanasia Bill anema nokdaker

March 05, 2021: Ireland nung 'euthanasia' (shiranger ka timtemba anendaksütsü atema tekaraba nung südaksüba) ozüng yanglushitsü aser soseta asüba nung yarisemtsü atema sorkari maparen inyakba anema Protestant Arogotem aser Roman Catholics Arogotemi longjemer ola adokdar.

Church of Ireland, Presbyterian Arogo aser Roman Catholic Arogotemi Ireland sorkar dang 'Dying with Dignity Bill' ji agientsüla, ta takhangba agütsüogo.

Taoba ita doctor, nurses aser geriatricians 2,000 dak temai petition ka nung sign süa Oireachtas Committee on Justice dang 'euthanasia' magizüksü mepishi.

Ireland nung Presbyterian Church Arogoi Oireachtas Committee on Justice dang "Iba Bill ya ozüng kümra ibaji ajanga Ireland nung alirtem soseta asüba nung yaritsü atema physician nem temeden agütsütsü," ta metetdaksü.

Arogo indang Council for Public Affairs panel-isa, "Nisung ka taküm tatembangleni arudang tajungtiba nung yaritsüla, akümüli metembang tashi taküm tajungtiba nung lidaktsütsü atema yaritsüla; iba nungji rangloker inyaktsüla," ta ashi.

"Loktiliba ka chichia asadangbaji, loktiliba nung timtemertem koba tashi anepalur, ibaji ajanga asadangtsü. Iba Bill ajanga parnok jenjang tajungba masü saka tamajungba kümdaktsütsü. Iba nungji ajemdaker iba Bill ya magizüksüla," ta metetdaksü.

Church of Ireland lenirtemi Committee dang, "Iba Bill ajanga soseta asüba nung yaritsü atema temelaba agütsüba dang masü saka 'euthanasia' ya ozüngi melaba ka kümdaktsütsü. Ibaji tanga kecha masü saka meimchir ka tepsetba lir," ta ashi.

Roman Catholic Arogo nungi putirtemia, nisung ka

tekaraba nung asütsü atema yaritepbaji tim masü, mapang talangka shirangertem taküm tajungtiba nung tembangdaksütsü atema akokba tashi tajungtiba agi anepalutsüla, ta ashi.

Christian Institute Northern Ireland Officer, Callum Webster-i, iba Bill nung lendong keta lir aser tetsübuttsüka lir, ta ashi.

Tawa osangbener den jembidang pai, "Tain süaka, shiranger ka süaka mesüra matamabensar ka süaka nisung shia dak tajung kaka lir. Tangar dak metaloker alitsüa jenjang ka nung liaka parnok dak tajung kaka lir," ta ashi.

"Soseta asüba nung yariteptsü atema euthanasia temeden agütsüba ajanga tang mezüng Ireland nunger ozüng ajanga nisung karbo tamagitsü kümogo ta züngshitsü. Iba Bill agizükyonga kobi melii meimchir temden atema inyakertermi iba ozüng yanglushitsü atema akhangtsü," ta paisa ashi.

ANO GO ABEN TSÜNGREM DEN

Tamang sempet

Mathi 15:21-28

Taochi agi tamang ajanga nenok kümzüker. Efesa 2:8

Laishiba Khrista dak amangba tamangji tongtipangtiba onük ka lir. Ibri 11 ajunga nungji tamang indang ashir. Idakji tamang tetezü shia lir, "Teyimla otem indang shitak metetdaksüba, manguba otem asoshi kuli" (Ibri 11:1).

Tongmelang agi tamangji, "Tagizükba teka" ta ajatsü akok. Iba jagi Tanela Temeshi ain ajanga Yisu Khrista nung Tsüngremer tatok aser teti taküm soeter.

Ano tamangji tia tasak temüla ajak nung mechiogoi akanga ammetba teka lir. Tamang ajanga nüburtem tashi agüja tasü tait mapa inyakba asenoki Laishiba nung azünger. Yisua Pa mapa inyakba mapang tasü tait tamang Tatishitsü ashi. Kannantsür ka tamang aser noklang madang kibur Rom nunger ka indang tenaprongla tenüng maka aser Israel kin nung maten. Arogo otsü putu ajak nung Tsüngremi tamang tulu aka jenti adokdaksür.

Yisu dak amangba ajanga kümzükerba tamangji taküm aliba aser jenjang agi alitsü makokba sempet lir aser aji asenoki Pa ajanga angur.

O taochiba Tsüngrem, Yisu Khrista nung onok tamang sempet tasen kümjang. Amen.

Tanzania linük nung putir 25 aser nun 60 Covid tashidak agi asü

March 05, 2021: Tesüiba ita tekümdangtsü osang ana tsüngda Tanzania linük nung metetdaksüogo.

Putir, Kitima-i, putirtem aser parnok dak tangu sashiba tsütsü nun tem asübaji Covid agi asü timtem densema coronavirus asü masüar junga mejangjar, tashidak temaitsütem liasü, ta kechiyong linük nung testing facilities junga mali, ajisüaka linük nung Catholic Arogoi parnok ajak dak coronavirus metetdaksü. tashidak temaitsütem liasü, ta metetdaksü.

Osangbenertem senden ka nung jembidang Tanzanian Episcopal Conference nung Secretary, Charles Kitima-i "Nisungtem dak iba tashidak nüburtem dang, linük nung metendanger. Ibaji tebilemtsü coronavirus tashidak maneni indang health centres 500 shi llir, prokdar, anungji mask agitsüla aser social distancing tendangtsü atemabo facilities benshitsüla, ta mepishia mali," ta paisa metetdaksü.

Taoba ita World Health Organisation (WHO) director general, Tedros Adhanom-i tem aika süogo, ajisüaka ita ana Tanzania linük dang linük indang onok kanga süngmanger," ta Covid-19 data metetdakjang, metetdaksü. kechiyong linük nung wara tensa mejungi lir, ta metetdakja liasü.

Tanzania linük Tir, John Magufuli-ibo, sarasadem ajanga linük nung coronavirus tashidak madak takok nguogo, aser linük nung coronavirus tashidak Tanzania linük nung coronavirus samaogo, ta jembia aru, ajisüaka data kecha mebenden aser linük linük nung Catholic Arogoibo Tir, John Magufuli-ia UN's tang agi tanabenbuba linük nung vaccination programme nung coronavirus tashidak anema shilem agitsü memelungi liasü.

OLONG PAITEP # 5744

1		2		3		4	5			
				6						7
		8								
9				10		11				
			12						13	
						14				
16						17				

TIPILEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 5743 TELANGZÜBA


TIPILEN :

- 1. Tanga, 6. Wara, 7. Rajang,
- 9. Anük, 10. Jenjang, 11. Alar,
- 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak,
- 8. Ainer, 9. Anema, 10. Jabili,
- 11. Among, 12. Miim, 13. Anem.

Noksa nung meputepi aliba 14 bushiang



TANÜBO NAI LANGZÜANG

Q. Koba küm International Civil Defense Organization (ICDO) Congress ngutet?

- A.1930 B.1931 C.1932 D.1933

(Taruba adok nung onoki langzüsü)

YASHI ADOK TELANGZÜBA : 53buba

AO OSHI ANGAZÜKDAK:

TANÜ ANGAZÜKTSÜBA OJANG

Ait
(v.) ki telongi aiba (get inside)
* Kütsü onok takdangi ait.

Ait
(n) Arem shiruru tzü ajemdak tesem. (Watering spot for wild animals)
* Ozü lu nung ait tajung ka lir.


Ait
Putu tatar menden, yimtenyimli ken o latetdak (Legislative body)
* Putu ait nung alirtemiang temzüng ozüng lateter.



Tir Yimyim

NAI-A YA METETTER MA?

MARCH 06 NÜ ASOR TONGTIBANG NISUNG KAR:



David Gilmour



Gordon Cooper

- Italian painter/sculptor Michelangelo (1475)
- French dramatist Cyrano de Bergerac (1619)
- English poet Elizabeth Barrett Browning (1806)
- Mercury astronaut L. Gordon Cooper (1927)
- Russian cosmonaut/first woman in space Valentina Tereshkova (1937)
- Actor Ben Murphy (1942)
- Singer Mary Wilson (1944)
- Musician/singer David Gilmour (Pink Floyd) (1946)
- Actor Tom Arnold (1959)
- Actor D.L. Hughley (1963)
- Actor Connie Britton (1967)
- Basketball star Shaquille O'Neal (1972)
- Actress Jhanvi Kapoor (1997)

SUDOKU # 5785

				4		9											
		7					8	7	5	3	4	8	6	2	9	1	
		3					6	9	6	4	7	2	1	8	3	5	
	1		8	2		7			3	1	7	8	6	2	5	4	9
5						3	2	4	8	2	5	9	7	1	6	3	
4		2		7	6			1	5	9	6	1	4	3	7	8	2
7	2	4		3		8	1	5	6	4	9	2	1	8	3	5	7
9	6			1		4	3	2	3	5	6	7	4	9	1	8	
				5	2	6			1	7	8	9	3	5	4	2	6

TELANGZÜBA # 5784

OJANG LUTEP # 5330

AALMI	:																		
UNNG	:																		
LUURT	:																		
TARIL	:																		
KAART	:																		
EKENSSAR	:																		
AAJK	:																		
EIP	:																		
SSAPE	:																		
BALLIIRRO	:																		

OJANG LUTEP TELANGZÜBA # 5329

TEMEIM MEKONGA AKÜMBA AJANGA NISUNG
TSÜNGDA TESENDAKTEP MEJUNGI KÜMA AOER

TAN HOPTA ATEMA - KOMA SÜLA ?

Q. Nagaland nung yi ayokba dokan odia lapokdaktsü nunga koma süla?

Mamata-i Nandigram nungi tokteptsü; TMC-i candidate 291 sangdong



March 05, 2021 nü Kolkata nung West Bengal Chief Minister aser TMC tongti, Mamata Banerjee-i taruba assembly elections atema lar party candidates sangdongba sülen lai osangbenertem den jembidang tangokba noksa nung angur.

New Delhi/Kolkata, March 05 (Agencies): Hokolbarnü TMC tongti lenir aser West Bengal Chief Minister, Mamata Banerjee-i, lai taruba state assembly election nung Nandigram menden nungi tokteptsü, ta sangdong.

Hokolbarnü TMC-i candidates 291 sangdong; candidates rongnung tetsür 50 aser Muslim nung candidates 42 densema lir. Mamata-i north Bengal kübok menden asem atemabo tang tashi candidates meshim.

Osangbenertem den jembidang Mamata Banerjee-i, "Tangbo onoki lanurtem dak

rangloker inyak. Menden 27-28 bo lanurtem nem agütsütsü. Coronavirus wara aliba aser Election Commission telatetbatem nung ajemdaker tangbo arrshi küm 80 dak temapurtembo meshim," ta metetdaksü.

"Tanü onoki candidate 291 sangdonger, parnok rongnung tetsür 50 aser Muslim nung candidates 42 densema lir. North Bengal nungbo menden asem atema onoki candidates meshim," ta laisa metetdaksü.

"Ni Nandigram menden nungi tokteptsü, ozü party nung külem lenir Sovandeb Chattopadhyay-i Bhawanipore

menden nungi tokteptsü. Onoki nungtugu artists, saisaponger, osangbenertem aser sobaliba nung mongintema aika nem party ticket agütsüogo," ta lai metetdaksü.

TMC tongti lenirisa, "Tang teinyakdak TMC MLA 23-24 bo kanga tain asüba densema kuli balala ajanga meshim," ta metetdaksü.

"Iba election ya kanga tongtibang. Yimlibilema ni yariang aser onok dak tamang kaang. State tajungtiba kümdaksütsüji kü mangdang lir. TMC sorkari maneni jang, Kanyashree aser Swasthya Sathi angati agütsütsü," ta laisa ashi.

Myanmar nungi arurtem nokdangtsü atema arrtsülen mita repranger

New Delhi, March 05 (Agencies): Myanmar linük nungi refugee tem India telungi aitba nokdangtsü atema Hokolbarnü India sepaitemi arrtsülen patrolling tenzükogo.

Mizoram state kübok Champhai district nung sorkar ketdangser, Maria Zuali-i, "Tang tashi nungbo onoki shinga linük telungi maitdaksür," ta metetdaksü.

Myanmar nung tang sepai yimsüsüba lir aser sepai tongti ketdangsertem tetuyuba kübok meliner police ketdangsertemi

arrtsü adena India-i aittsü meranger.

February 1, 2021 nü Myanmar nung sepaitemi democratic lenirtem apuba sülen linük nung emergency sangdonga liasü. Iba sülen nüburtemi longkak aitba mapang nung nisung 50 dak tema süogo aser aika yiruogo.

Myanmar nungi India linük telungi aitba nokdangtsü atema Hokolbar nungi India nung sepaitem aser police-i patrolling tenzükogo.

Serchhip district nung sorkar

ketdangser, Kumar Abhishek-i, tetsür ka aser tanur ka densema nisung 8 arrtsü adena linük telungi aitogo, aser ano maneni aika arutsüa akok, ta metetdaksü.

Tesüiba anogo ishika tsungda Myanmar police 30 aser parnok kibongtem arrtsü adena India telungi aitogo, ta Mizoram nung police ketdangser kati metetdaksü.

"Nisungtem lenmang balala ajanga arur aser arrtsülen tapok aika aliba agi nisung aruba nokdangtsüji kanga tasak," ta ketdangserisa metetdaksü.



Bhubaneswar (Odisha), March 05, 2021: Hokolbarnü Bhubaneswar nung taoba mapang Chief Minister, Biju Patnaik asoba anogomong nung pa nem akhüm agüja nüburtemi cycle rally nung shilem agiba noksa nung angur.

Aluyimertemi mapang talangka longkak aittsü renema lir: Tikait

New Delhi, March 05 (Agencies): Centre sorkari benokba aluyimba ozüing tasen asem anema longkak ait tenzükba sülen Honibarnü anogo 100 ajungtsü anogo ka dang lia Hokolbarnü aluyimer lenirtemi, parnoki mapang talangka longkak aittsü renema lir, ta metetdaksü.

Bharatiya Kisan Union (BKU) lenir, Rakesh Tikait-i, nungdak dang süra aluyimertemi mapang talangka longkak aittsü atema renema lir, ta ashi.

Osangbener den jembidang Rakesh Tikait-i, "Onok kanga junga renema lir. Sorkari onoki ashiba manga tashi aser onoki akhangba mataloktsü tashi onok yang (Delhi arrtsülen) nungi mainshitsü," ta metetdaksü.

Aluyimertemi aluyimba ozüing tasen asem anema longkak ait tenzükba anogo 100 abensaba nungtem nung Honibarnü aluyimertemi linük yimtiba, Delhi arrtsülen six-lane Western Peripheral Expressway ghonda 5 tashi mokdangtsü.

Aluyimertem lenir, Darshan Pal-i, "Anogo 100 sülen onoki sorkar nem ano tesashiba takhangba agütsütsü, kechiyong tsüingsang-a tamajungba akümtsü," ta ashi.

Tan ita aluruhba mongpu tenzüksü, ajisüaka yimtsungtem nung kiyongertem aser medemertemi alu ruhtsütsü, anungji aluyimertemi yangi maneni longkak aittsü, ta Pal-i ashi.

"Item ozüing ya onok asoshi tasüba temerenshi obendang amai lir. Anungji onoki mapang

talangka longkak aittsü atema renema lir," ta paisa ashi.

Aluyimertemi longkak aitba ajanga linük yimtenren nung aluyimertemi shilem agiba dak sendakba nung Swaraj India nungi Yogendra Yadav-i, "Longkak aitba ajanga aluyimertemi yimtenren nung shilem agir. Iba ya ajanga aluyimertem jenjang metetter. Aluyimertem den masayatsü atema yimtenren lenir ajak dang tatishitsü sayuogo," ta metetdaksü.

Osangbener den jembidang Yadav-i, "Nisungtemi aluyimertem ya zübazüba bilem, ajisüaka tangbo süoki ia agir, kechiyong aluyimertem den asayaba nung takoksa tulu lir," ta ashi.

"Iba ya ajanga aluyimertem longjemdaksüogo. Haryana aser Punjab nungi aluyimertem longjemogo. Uttar Pradesh nung tamangba lokti tsungda telemsa adokdaksütsü merangaka longkak aitba nung Hindu nung aser Muslim nung aluyimertem ka küma longjemogo. Rajasthan nung Gujjars aser Meenas longjemogo," ta Yadav-i ashi.

All India Kisan Sangharsh Coordination Committee (AIKSCC) nung lenir, Kavitha Kuruganti-i, aluyimertemi longkak aitba ajanga lenla aika nung yariogo, loktiliba nung tajangzük agütsüogo, ta ashi.

"Punjab nung temesepba mozü achiba aser yi ajemba kanga ajema kümogo, kechiyong lenirtemi iba mapatong nung shilem agir," ta lai ashi.



March 05, 2021 nü Prayagraj nung Prof. Rajendra Singh (Rajju Bhaiya) University Convocation sentong nung Uttar Pradesh Angh, Anandiben Patel-i kaketshir ka nem degree agütsüba noksa nung angur. Kasa noksa nung Uttar Pradesh Deputy Chief Minister, Dinesh Sharma-a angur.

India linük nung coronavirus vaccine dose crore 1.8 agütsüogo

New Delhi, March 05 (Agencies): India linük nung tang tashi nung Covid-19 vaccine dose crore 1.8 dak tema agütsüogo, ta Hokolbarnü Union Health Ministry-i metetdaksü.

Vaccine agirtem rongnung healthcare workers (HCWs) mezüngbuba dose agir 68,53,083, HCWs tanabuba dose agir 31,41,371, frontline workers (FLWs) mezüngbuba dose agir, 60,90,931, FLWs tanabuba dose agir 67,297, comorbidities keta alir arrshi küm 45 temapur 2,35,901, aser arrshi küm 60 temapur 16,16,920

densema lir. March 4 nü vaccination tenzükba sülen anogo 48buba-Brihostibarnü kija nung vaccine dose 13,88,170 agütsüogo, ta Health Ministry-i metetdaksü.

Tesüiba ghonda 24 tsungda state trok- Maharashtra, Punjab, Haryana, Gujarat, Madhya Pradesh aser Delhi nung nisung aika dak coronavirus putetogo. Tesüiba ghonda 24 tsungda linük nung nisung 16,838 dak coronavirus tashidak putetba nungjagi shilem 84.44 bo state trok nungji lir, ta Health Ministry-isa metetdaksü.

Afghanistan nung tetsür doctor ka pokset, mapa inyaker asem khaset

Jalalabad, Metsüremi/ March 05 (Agencies): Afghanistan anüdoklen Jalalabad yimti nung bomb ka apokdak tetsür doctor ka asü aser linük anüdoklensa manger mesangwajungi prangbong bona alir telok kati civilian tenet khaset, ta ketdangsürtemi Brehostibarnü ashi.

Doctor ka ya la mena aliba gari nung magnetic bomb ka menaloktsür pokdaksüba mapang asü, ta eastern Nangarhar province indang governor office nungi ashi.

"La ya rickshaw ka nung senzüba mapang bomb ya apok," ta governor indang odongtari ashi.

Doctor ya provincial hospital indang maternity ward nung la mapai oyaa liasü. Iba lendong

nung tanura ka yiru. Provincial hospital indang odongtar katia iba lendong atalokba indang ya ashi.

Nangarhar province indang police tekolakba, Juma Gul Hemat-i ashiba agi, prangbong agi khaseter ya Sorkh Rod district nung plaster factory ka nung inyaker liasü. Police temi temolung melembi bilemba nisung asem puogo, ta pai ashi.

Mapa inyaker ajunga ya Afghanistan nung kin tila, Shia Hazara nungi lir, ta provincial police tekolakba indang odongtari ashi. Asürtem ya factory nung mapa inyaksü asoshi linük yimtiba, Kabul, central Bamyas aser northern Balkh province nungi arua liasü.

Iba lendong agütsüba atema telok katia tenüing agia mali, saka

ISIL (ISIS) teloki Shia nung den rara sangdonga lir aser mapang shia Hazaras nung dak tenük yoker lendong agütsür.

Jalalabad nung minute ishika agi tetsünga iter osangbener tetsür asem tashi tesem balala nung khaseter anogo ana dang lir iba lendong ya ajurur.

Tetsür asem, Mursal Wahidi, Sadia Sadat aser Shahnaz Raufi khasetba atema ISIL temi tenüing agia lir. Par asem ya mapa nungi külemi ayazük aser kidangi aoba mapang tesem balala nung mapang kasa shi nung khaseta liasü.

Saka lendong aika tenüing agia mali. Sorkaribo Taliban tenüing asener, shirnoki linük nung tesem tuluka amokbanga lir.



Opposition lenir aser taoba mapang tir menden asoshi toktepsang Ousmane Sonko apuba anema Dakar, Senegal nung aliba Cheikh Anta Diop University campus nung longkak aitertemi riot police dak long agi aonba noksa nung angur.

Pakistan PM Imran Khan-i tembartem ajurutsü



Islamabad, Metsüremi/ March 05 (Agencies): Pakistan nung hopta tetenzüklen Senate elections nung tamakok kar anguba sülen National Assembly nung vote of confidence agitsü lia tasa akang-akang yanglutsü atema Ato Kilonser Imran Khan-i par tembartem den Hokulbarnü senden ka jatap.

Pakistan Democratic Movement (PDM) candidate aser taoba ato kilonser Yusuf Raza Gilani-i Bodhbarnü ruling Pakistan Tehreek-e-Insaf (PTI) candidate Abdul Hafeez Shaikh madak takok ngua Khan atema tebilemsü khuret tulu aru, shibai par Cabinet asoshi nübuyim jaja liasü.

Upper house nung election agiba nung finance minister-i takok manguba ajanga Opposition teloki Khan dang ato kilonser menden yujang, ta takhangba agütsür.

Ajisüaka Khan-i Honibarnü National Assembly nung vote of confidence agitsü, ta sangdong. Shaikh ya vote pongu agi tsükdaksü.

Tir Arif Alvi-i iba senden ya

Honibarnü jazüka lir, kong Khan'er PTI teloki tembar party tem teyari nung nütsüing timba sayutsü temolungtetba lir.

Khan-i Mutahida Qaumi Movement Pakistan (MQM-P), Pakistan Muslim League Quaid-e-Azam (PML-Q) aser Grand Democratic Alliance (GDA) telok nungi ozüing yanglurtem ajurua vote of confidence indang jembitsü.

National Assembly nung Khan-i ozüing yanglur nübu 171 teyari nungdaker, kong züingsem 342 aliba nungi menden ana tazüing lir.

Khan-i vote of confidence agitsü lemtetba ya ajanga par telok tashi maitba sayur, ta Opposition lenirtemi ashi.

"Ato Kilonser tamendak dak mali aser vote of confidence akokba nung tajanzük mali," ta taoba ato kilonser aser Pakistan Muslim League-Nawaz lenir, Shahid Khaqan Abbasi-i ashi.

Pa lenisüba nung house-i temolung melemra opposition bench nung amentsü, ta Khan-i linük dang Brehostibarnü sangdong.

Myanmar police temi longkak aiter ka khaset

Naypyitaw, Metsüremi/ March 05 (Agencies): Myanmar nung taoba ita mitkartemi sorkar atsüingdokba anema Hokulbarnüa longkak aitba mapang police temi injang khalokja nisung ka khaset, kong linük balalai mitkar yimsüsüba aitsür aser UN Security Council nung iba tebilemsü indang jembitsü lir.

New York nung aliba UN mission nung inyaksü mitkartem atsütepba mapang aser longkak aiter civilian ter dak tema asüba sülen United States mitkartem dak tenük yoker tenokdangba tasen agütsüba mapang ka nung azüdokshi ya ataloker.

Election ajanga shimtetba Aung San Suu Kyi'er sorkar tanaben amenokjang ta Hokulbarnüa jila aser yimti balala nung activist temi takhangba agüja liasü, aser Mandalay yimti nunga nisung meyerijang aika rongrong madoki yimtung nung jaja.

"Long putu süyio, nenoki amokmerenba agi onok tsüba mali," ta nüburtemi ayimten.

Mapang tatsüka lir longkak aitertem ya senshidaktsütsü asoshi police temi injang khaloktsü aser iba mapang nisung ka dak terok nung khashi.

"Pa ya arishi küm 25 shi asütsü amai bilemer, saka kinungertem atateper," ta doctor kati asür temang anepaluba sülen osangbener dang phone ajanga ashi.

Yangon yimti nunga longkak aitertem arishitsü atema police temi rubber bullets aser stun grenades khaloktsü, kong doctor 100 shi coat sentsü temesüing agir longkak aiter den dena liasü.

Yangon anüolen Pathein jila nung nisung telok ka adenshia liasü.

Brehostibarnüa police temi yimti kar nung tear gas aser prangbong khashishia longkak aitertem arishi saka Bodhbarnü

amabo mesüi tazüokba liasü. Bodhbarnü longkak aiter nisung 38 tepset, ta United Nations-i ashir.

Mitkartemi timtem magütsü longkak aiter anema nokdakba anentsüla, ta U.N. human rights chief Michelle Bachelet-i ashi. Osangbener 29 densema nisung 1,700 dak tema puogo, ta Bachelet-i ashir.

Myanmar kidanger Singapore-i rakpoka jembiba ama linük katia jembia mali, aser nüburtem anema armed forces temi nok-o-nü amshiba ya linük asoshi maksü, ta foreign minister Vivian Balakrishnan-i ashi.

Hokulbarnü linük tesem aika nung electricity supply tem shibangtsü. Saka ibai system meshidakba ajanga lir, ta ketdangsür kati ashi.

New York nung aliba United Nations nung Myanmar tenüing nung shibai shilem agitsü ta atsütepa tang atemabo anenogo, kechiaser mitkartemi

shimtetsang mapa nungi anen aser Ambassador Kyaw Moe Tun maneni iba mapa inyaker, ta Myanmar UN mission ajanga ashi.

February 1 nü mitkar tashi amshia sorkar atsüingdokba melenshidaktsütsü atema nungdakba mera ajunga amshiang, ta Kyaw Moe Tun-i UN General Assembly nung linük balala dang ajungshiba sülen mitkar lenirtemi pa Honibarnü mapa nungi anenja liasü.

Totuyuba sülen manidakba mechi temerenshi agütsütsü tetsüpu agi Myanmar police tanishir 19 tashi India-i jena aru, ta Indian police temi osangbener dang Brehostibarnü ashi.

Myanmar activist temi arishi küm 75 tain Suu Kyi chioktsü akhanger, shiba mitkartemi sorkar atsüingdokba anepdang apu. Mitkartemi election tasen agitsü ta nangzükba parnoki magizüker.

November 8 nü election agiba nung Suu Kyi'er National League for Democracy (NLD) ajanga takok angu, saka iba election nung ashikülak mapa inyak ta tai tonglokja mitkartemi iba election magizüker. Saka election commission-ibo vote tim yimya nung agütsür, ta ashir.

Sorkar atsüingdokba sülen Myanmar mitkar yimsüsürtemi Federal Reserve Bank of New York nung yua aliba sen billion \$1 jungnüa agizüktsü merang. Saka US ketdangsürtemi item senotsü ajunga soita yuogo.

U.S. Commerce Department ajanga Myanmar indang defence aser interior ministry aser mitkar indang company tulu ana den shishilembatsü nokdanga lir.

Ajisüaka item mera yagi timtem kangabo majurutsü, kechiaser item company yagi bendang lima nung shishilempaba tsütsü shilem kangabo magir.

Nubia Red Magic 6 Series sayaogo



New Delhi, Metsüremi/March 05, 2021 (Agencies): Qualcomm Snapdragon 888 processor aketba Nubia Red Magic 6 gaming smartphone ana China nung sayaogo. Game asayadang phone tali tatsük mekümdaktsüsü atema Red Magic 6 aser Red Magic 6 Pro nung active cooling system inokja lir, koba Nubia Red Magic 5G den kasa alitsü.

Smartphone anaprongla nung LPDDR5 RAM, UFS 3.1 storage aser triple rear camera angutsü. Iba Smartphone tanga shishilembadak ayoktsü asoshi company ajanga osang tejangja magütsü lir.

Nubia Red Magic 6 - 8GB + 128GB variant jenjang CNY 3,799 (sen 42,700) aser 12GB + 128GB jenjang CNY 4,099 (sen 46,000) alitsü. Kasa smartphone ya 12GB + 256GB variant nunga angutsü aser iba variant jenjang

CNY 4,399 (sen 49,500) asütsü. Item model ya Carbon Fibre Black aser Cyber Neon sentsü nung angutsü aser jelia mekaa ayutsü atema lapoktsüogo.

Specification tsütsü reprangdangra, Nubia Red Magic 6 nung 6.8-inch full-HD+ (1,080x2,400 pixels) display den 165Hz refresh rate, 500Hz single finger touch sampling rate aser 360Hz multi-finger touch sampling rate angutsü. Iba phone display panel nung 91.28 percent screen-to-body ratio aser SGS Low Blue Light Eye Care certification angutsü, koba ajanga tenük nung timtem magütsü.

Phone maparen, Qualcomm Snapdragon 888 SoC deb Adreno 660 GPU, 12GB RAM aser 256GB storage ajanga achaayangtsü.

Iba smartphone tesülen, triple camera setup ka angutsü. Iba

setup nung 64-megapixel primary camera, 8-megapixel ultra-wide-angle camera aser 2-megapixel macro shooter inokja lir. Selfie atema, iba handset tejaklen, sensor tilaka inoka yanglutsüogo. Tanga feature tsütsü reprangdangra, iba smartphone nung 5G, Wi-Fi 6, Bluetooth 5.1, GPS, 3.5mm headphone jack aser charging atema USB Type-C port angutsü. Red Magic 6 nung battery tasazük 5,050mAh alitsü aser 66W fast charging support asir.

Company-i ashiba agi, iba gaming phone nung ICE6.0 cooling system ka angutsü, kong 18,000-rpm high-speed centrifugal fan ka dena lir.

Ano külen, Red Magic 6 Pro - 12GB + 128GB variant jenjang CNY 4,399 (sen 49,500) aser 12GB + 256GB variant jenjang CNY 4,799 (sen 54,000) alitsü. Kasa smartphone ya 16GB + 256GB aser 18GB + 512GB storage model nunga angutsü aser variant ana jenjang CNY 5,299 (sen 59,600) aser CNY 6,599 (sen 74,200) alitsü.

Red Magic 6 ama Nubia Red Magic 6 Pro nunga feature shilem timbaka kasa angutsü, ajüsüka 16GB RAM aser 512GB onboard storage balaka alitsü. Battery medemdangra, Pro nung tilaba - 4,500mAh alitsü saka 120W fast charging support asütsü. Camera aser connectivity specification ajak Red Magic 6 ama angutsü.

'A Quiet Place Part II' May 28 nü sayatsü

New Delhi, Metsüremi/March 05, 2021 (Agencies): Hokolbarnü, Actor aser director John Krasinski-i 'A Quiet Place' sequel sayatsü asoshi osang sangdongogo. 2018 küm sayaba A Quiet Place film ya imlaa ataba dang nung takaraba theatre nung sayatsü terenemba lir.

Memorial Day anogomung - May 28, 2021 nü 'A Quiet Place Part II' sayatsü.

Paramount Pictures-i iba sequel sayatsü anogo melen ita ishika tejakdang sayatsü telemtetba agiogo. Mezüngbo iba sequel ya September 17, 2021 nü sayatsü renem, saka ita ishika jelia May 28, 2021 nungang sayatsü.

Krasinski, shibai sequel yangluogo, pai Twitter ajanga fans dang iba osang lemsatop.

Alima ajanga asüngba coronavirus tenokdangba ajanga, Emily Blunt-i tongti shilemagiba film - A Quiet Place Part II' sayatsü asoshi aiben anogo balala melenshia aruogo. Iba film ya taoba küm March ita sayatsü renemer liasü, saka America nung Covid-19 wara prokba ajanga iba sentong thitsü.

America nung lockdown alitsü osang magütsüdag, March 08, 2020 nü New York City nung 'A Quiet Place Part II' atema Paramount-i red carpet sentong ka ayongzükja liasü.

Director inyakba dak alaka,

Krasinski-isa 'A Quiet Place II' atema otsü zülutsüogo. Iba sequel nung original cast züngsem Blunt, Millicent Simmonds aser Noah Jupe nung dena lir. Parnok den cast tasen Cillian Murphy aser Djimon Hounsou nati tongti shilemagiba angutsü.

'A Quiet Place' film ajanga telanzüba tajung jenti nguogo aser best sound editing atema Academy Award nomination den Critics' Choice nomination balala angu.

A Quiet Place mezüng film ya USD 21 million budget nung yanglu aser alima tesem balala nungi box-office nung USD 340.9 million tashi aazükogo.

Mon DTF senden agiogo

Mon, Metsüremi/March 05, 2021 (TYO): Tang agia aliba Covid-19 Vaccination maparen atema Bodhbarnü DC Conference Room nung Mon District Task Force senden menogo, kong DC, Mon, Thavaseelan K IAS menden liasü.

Iba senden nung Dr. Mheche Mero-i, Mon District telungtet nung COVID-19 Vaccination session 62 tashi achaayanga agiba telok dang metetdaksü. Register ser alir Healthcare workers 1429 nungi parnok nisung 755 nem mezüng dose aser healthcare worker 406 nem tanabuba dose agütsüogo. Ano külen, frontline workers 4064 nungi 1577 nem mezüng shilem nung Vaccine agütsüogo, ta pai ashi.

HCWs aser FLWs timba nem Covid-19 mozü agütsütsü aser Block Task Forces-i maneni tajungtiba nung iba mapatong

achaayangtsü asoshi teloki lemet. Tang, Mon District nung Covid-19 Vaccination shilem tasembuba achaayanga agir asünung, arishi küm telemsa atema renemer aliba ajak takok ngua agitettsü aser atsüayonga meli iba maongka agütsü mechi nüburtem ajungshitsü asoshi olemtepa liasü.

Covid-19 Vaccination drive shilem tasembuba nung, mezüng Vaccine agiba atema board züngsemtemi Executive Secretary KBBB aser President Konyak Union naprongla dang pelaba metetdaksü aser leniri iba mozü dak tamang lateta sayuba maparen atishia jemi aser lokti lennirtemi nübur dang iba ya angatetdaksütsü asoshi telok jembitep.

District Immunization Officer, Dr. Shasinle Tep-i, tang district nung Covid Vaccination

Centre pezü - i) District Hospital Mon ii) Aboi CHC iii) Tobu CHC aser iv) Tizit PHC lapoka lir aser item centre ya hopta nung anogo pezü lapoker, ta metetdaksü. Dr. Tep-isa, Covid-19 mozü agütsü atema nüburtem tenüng agütsüba dak sendakba nung, District kübok ano iba amala vaccination centre talila lapoktsü asoshi tebilemba lemsatopogo.

Maneni, yimtsüng tesemtem nung Covid-19 Vaccination drive shilem tasembuba ayimjema agütsü asoshi NSRLM teyari agütsü. Vaccine aser data bendenba maparen dak sendakba nung, Medical Team ajanga NSRLM kübok inyakertem nung Medical team den longjemer District Administration ajanga ward lemsar sensitisation drive ayongzüktsü, ta sangdong ajanga metetdaksü.



Ao Baptist Arogo Mungdang (ABAM)

IMPUR-798 615, MOKOKCHUNG,
NAGALAND : INDIA

ABAM Sanen Luden Telemtetba Jangjashitsür

ABAM Sesquicentennial 2022 nüngtem nüngo kaket zülutsü mapa tenzük. Saka aianutsür Narola Ao McFayden-i züluba kaket "Mary Mead Clark Her Life and Legacy" kaket nung Dr. Clark Naga tenemi mezüng atuba anogoji, ABAMi amshia aruba anogo den balala ta bushitet. Anungji SQC planning committee nungi iba nüngu kaketji koba anogo nung amendaker zülutsü ta ABAM Sanen Luden dang asüngdang. Anungji Sanen Ludeni tangatetba tajung yur mapang agia yamai jempitep: SQC nüngu kaketji, Dr. Clark shiba Naga tenemi tsüngtong atu, pa account koba asenoki amshia arur, yangji amendaker zülutsü; Tang koba kaket Narolai zülua lir, iba kaket nung otsüren jangjashitepa tembanga maru tashi, kaketji khen meyoki aser mebelenshii atatsü ta tangatetba yur tongmelang agi yamai telemtetba zülua ayu:

February 25, 2021 ABAM Sanen Luden Telemtetba (SLT/2021-20) ama Narola Ao McFayden-i züluba kaket "Mary Mead Clark Her Life and Legacy" koba Clark Theological College, Aolijen ajanga 2019 küm publish süogo; iba kaket nung arogo otsüren tashishitsü reprangtet nung, iba kaket mayoktsü aser mebelenshitsü.

Sd/-
Dr. I. Lolen Imchen
President, ABAM

Sd/-
Rev. Dr. Mar Atsongchanger
Executive Secretary, ABAM

ABS aketba Bajaj Platina 110 saya

Mumbai, Metsüremi/March 05, 2021 (Agencies): Bajaj

Auto-i ABS (Anti-lock Braking System) aketba Platina 110 sayaogo, koba segment nung mezüng alitsü. Iba motorcycle jenjang sen 65,920 alitsü. ABS braking technology ajanga aoksa mesüra ajungben brake apudang motorcycle ajushishia modaktsür. Iba motorcycle tejaklen 240 mm disc brake nung ABS ya inokja lir.

ABS feature tasen den külemi, Platina nung ComforTec package angutsü, kong quilted seats, Nitrox spring-on-spring suspension aser tubeless tyre dena lir. Platina nung 115 cc, four-stoke, single-cylinder, air-cooled engine den Electronic Injection inoka yanglutsüogo. Iba engine ajanga 7000 rpm nung 8.6 PS aser 5000 rpm nung 9.81 Nm torque agütsür.

Iba motorcycle nung rear view mirror tasen den

tekümzütsü atema hand-guard inoktsüogo. Platina tasenba ya India nung Bajaj Auto dealership ajanga charcoal black, volcanic red aser beach blue sentsü nung angutsü.

Iba den bendenloksema, Platina 110 ABS nung feature talisa front & rear (with Nitrox) suspension shilem 20% agi talangba, seat talang, LED Headlamp den DRL aser ABS-indicating analog speedometer inoka yanglutsüogo.

"Platina 110 ABS ajanga safety tsütsü India nung customer aika yaritsü imlar. Platina customer million 7 dak tema lir aser tanü tashi shishilembadak iba segment takok ngua odar aser ABS inoksema yangluba ajanga iba segment nung tanga brand balala den tajungba tokteptsü maongka agütsür," ta Domestic Motorcycles Business Unit, Bajaj Auto Ltd President, Sarang Kanade-i ashi.



Mumbai, Metsüremi/March 05, 2021: Hokolbarnü, BKC, Mumbai kübok COVID-19 vaccine centre ka nung actor Saif Ali Khan Covid-19 Vaccine agir sülen taodang tangokba noksa ka yangi angur.

Aaron Finch-i otsü tasen ka yangluogo

Wellington, Metsüremi/ March 05, 2021 (Agencies): Australia aser New Zealand na tsüingda asaya aliba T20Is asayamung nung Australia captain Aaron Finch-i otsü tasen ka yangluogo. T20Is asayamung nung 'sixes' 100 tashi zükloksür Australia nung batsman rongnung Aaron mezüng kümogo.

Sky Stadium nung Australia aser New Zealand na tsüingda T20I pezübuba asayaba mapang, Aaron-i iba alizüng tongtet.

T20Is asayamung nung 'sixes' 100 mesüra iba dak tema yangluteter batsman rongnung Finch asayar trokbuba kümogo.

Iba sabang (T20Is) nung 'sixes' timtiba züklokja alir batsman ji New Zealand nung opener Martin Guptill alitsü. Pai T20Is asayamung nung six 135

tashi züklokja lir. Guptill sülen, India nung Rohit Sharma (127 sixes), England - Eoin Morgan (113 sixes), Blackcaps/New Zealand - Colin Munro (107 sixes) aser West Indies nungi Chris Gayle (105 sixes) nung alitsü.

Australia nung rongnung T20Is nung Sixes' timtiba zükloksüba den Finch-isa iba format nung run timtiba yanglur batsman kümogo. Finch-i iba alizüng tongtettsü atema külem Australia nung opener David Warner ajatetogo.

T20Is asaya 70 nung, Finch-i century 2 aser fifties' 14 densema run 2,310 yangluogo. David Warner ajatettsü atema, iba asaya (T20Is asaya pezübuba) nung Finch-i run 79 not out yanglutet.

Warner-i T20Is asaya 81 nungi century 1 aser half

century 18 densema run 2,265 yangluteta lir.

Maneni, Hokolbarnü Australia aser New Zealand na tsüingda Finch-i kanga dang junga shilem agiogo aser over 20 nung pa teyari ajanga Australia-i run 156 yanglutet aser parnok rongnung batsman trok tashi out asü. Finch-i six' 4 aser four' 5 densema ball 55 nung run 79 yanglutet.

Australia-i run 157 target yutsüba tongtettsü asoshi New Zealand-ia meranga asaya, saka Kiwis-i run 106 dang batsman ajak out süadok. Tang, team ana tsüingda T20Is asaya pungo nungi asaya pezübuba nung telok anapronglai asaya anana koka lir

T20I pungobuba aser tatemububa ya March 7, 2021 nü kasa tesem - Sky Stadium nung asayatsu terenemba lir.

4buba T20I: Australia-i run 50 agi New Zealand kokogo

Wellington, Metsüremi/ March 05, 2021 (Agencies): Hokolbarnü, Wellington kübok Sky Stadium nung Australia aser New Zealand na tsüingda T20Is series pungo nungi pezübuba asaya liasü. Tesemdanger team Australia-i run 50 agi asayamung ayonger telok New Zealand koka team ana tsüingda iba series 2-2 kümogo.

Iba series tetenzüklen, Australia pur kanga timtema asayar sülen, Deobarnü final asaya nung iba serie title atema parnok shilem agitsü terenemba lir.

Pezübuba T20Is asaya nung Australia team-i toss koka batting shim aser over 20 nung parnoki run 156 yanglutet aser parnok rongnung asayar trok out asü.

Tanabuba innings nung New Zealand-i alizüng metongteti over 18.5 sülen run 106 dang yanglur asayar ajak out süadok. Australia Captain Aaron Finch-i run 79 bendenloksüba ajanga team kanga nungita liasü. Kasa mapang, T20 international nung run timtiba yanglur Australia nung rongnung Finch kümogo. Finch-i run 2,310 tongteta pai

külem asayar David Warner (run 2,265) ajatetogo.

Iba asaya nung Finch-i ball 55 nung half century yanglutet, koba Finch indang 14buba T20I half-century alitsü. Over tatemlen, Kyle Jamieson bowling nung Finch-i Sixes' 4 tashi zükloksü, koba Kyle-i run 26 tashi agitsü.

Finch den yariteper asayatsüsa Australia batsman temi pa menunggett aser Black Caps bowler temi tongtibang batsman nem maongka magütsü asaya nungi yakta tukudaktsü.

Man-of-the-match award angutsüsa Finch-i New Zealand bowler ajak azüokteta asaya aser imla ataba ama külem team puri masayatet ta pai ashi.

Australia team nungi Kyle Richardson-i run 19 dang agüja wicket 3 agi. Kasa mapang, spinner rongnung Ashton Agar, Adam Zampa aser Glenn Maxwell nungeri wicket anana out sütsü.

New Zealand bowler rongnung Leg-spinner Ish Sodhi-i wicket timtiba agi. Over 4 nung Sodhi-i wicket 3 out

sütsü aser run 32 agitsü.

Black Caps pur innings nung opener Martin Guptill aser Tim Seifert nati run aikabo meyanglutet. Tenati mezüng over 3 nung four' ka ka dang züklokja liasü. Tetenzük over asem ya Australia spinner nem maongka agitsü.

Guptill-i run 7 dang yanglur out süadok aser run 30 alidang New Zealand pur ano wicket 6 tashi tukadok.

Wicket 6 tashi kara out süadokba ajanga New Zealand pur kanga timtema asaya aliba mapang, Jamieson-i team atema run 30 bendenloksü, saka Kiwis-i alizüng metongteti iba asaya tamakok angu.

Iba tamakok ajanga New Zealand skipper Kane Williamson-i team pur asaya ngua kanga mepelaba lemsatet aser Deobarnü final atema team asaya yimyatem melenshir asayatsü nungdaker, ta ashi.

"Tanü, innings tanabuba nung onoki kanga mejungi asaya. Khen khenbo junga asayatsü bilem yongjia bilemba aser mapa balala kumadoker," ta Williamson-i ashi.

Nagaland job reservation policy atema...

(Tapak 1 nungi...)

"Senden nung adenertemi pei pei tebilemba lemsatetpa sülen züngsem 14 agi akümba working group ka tentetogo. Iba nung cabinet sub-committee nungi züngsem 7 aser civil society telok 7 nungi züngsem kaka adentsü" ta Kronu-isa ashi.

"Tanü senden nung benokba onüktem bentetstü atema March 20 nü working group senden ka amentsü. Iba senden nungsa job reservation policy ajunga meyipa repringshimtsü aser ibaji cabinet sub-committee-i state sorkar dang abentsü" ta paisa metetdaktsü.

"Nagaland state indang reservation policy nung khurettem adoker aser iba jagi sorkari pocket, area, block mesüra tribe telemsa nung inyaknür. Iba atema sendaktepa alir ajak dang nungi tebilemba meshir tarutsü atema policy tajung ka yanglunür" ta Minister Kronu-isa shisem.

"Tanü senden nung civil society temi tebilembatem shiogo aser Chief Secretary-i sorkar indang policy PowerPoint presentation ajanga sayuogo. Working group-i pei pei kintem den tongteprateptsü aser iba osangji cabinet sub-committee

dangi abentsü" ta paisa metetdaktsü.

Working group atema tenüng agütsürtem: ENPO - E Kekongchim Yimchunger, TPO - Vipopal Kintso, CNTC - Sungro Kithan, ENSF - Sepeli L Sangtam, CNSA - Himahito, ENGOA - MS Thongpang saka NSF aser CCoRoRP teloktemi tenüng ano magütsü lir.

Senden nung Chief Secretary, J. Alam-i tesentepertem ajak pelaa agizük aser Deputy Chief Minister Y Patton-i civil society teloktemi Naga nung ajak atema tongtipang onük nung shilem agiba atema pelaba metetdaktsü.

IPL 2021: Dhoni-i anir CSK pur March 09 nungi training agitsü

New Delhi, Metsüremi/ March 05, 2021 (Agencies): Tan Indian Premier League 2021 season indang mezüng training camp nung Chennai Super Kings captain MS Dhoni lenisüba kübok team-i shilem agitsü terenemba lir.

Indian Premier League metenzükdang March 9, 2021 nungi iba training camp agitsü. Chennai nung MS Dhoni den domestic cricket asayartemi külemi CSK camp nung adentsü.

CSK CEO Kasi Viswanathan-i ashiba agi, iba season indang team pur mezüng training camp ya March 09 nungi tenzüktsü imlar aser Chennai nung azünga alir asayartemi iba camp nung shilem agitsü.

"Iba camp ya March 09 nungi tenzüktsü ama asadangteter. Mapang agütsütetstü pur asayartem training session nung adentsü. Iba training camp metenzükdang asayartem anogo pungo quarantine asütsü. Iba den külemi parnok ajak Covid-19 test osang negative asütsüla," ta pai shisem.

Chennai Super Kings nung India cricket asayartem iba camp nung adentsü aser parnok ajak telok balala lemsar camp

agitsü tesem tonga arutsü. Tang alima tensa tamajungdang, IPL 2021 atema Board of Control for Cricket in India (BCCI)-i asaya telemsa aser tesemtem indang osang tejanga magütsü yongjia, CSK-i iba asayamung (IPL) atema renemshitsü temulungtetba tulu lir.

Team nung asayar tajungtem anioksü atema CSK-i sen aikati Moeen Ali alizüka lir. Kasa mapang, Dhoni lenisüba kübok IPL asemben tashi takok angur telok - CSK-i contract nung off-spinner Krishnappa Gowtham anisemogo.

* IPL 2021 atema Chennai Super Kings Squad yamai alitsü:-

- Retained players: MS Dhoni, Suresh Raina, Ambati Rayudu, KM Asif, Deepak Chahar, Dwayne Bravo, Faf du Plessis, Imran Tahir, N Jagadeesan, Karn Sharma, Lungi Ngidi, Mitchell Santner, Ravindra Jadeja, Ruturaj Gaikwad, Shardul Thakur, Sam Curran, Josh Hazlewood, R Sai Kishore.

- Auction nung alizüker asayartem: Moeen Ali (Rs 7 crore), K Gowtham (Rs 9.25 crore), Cheteshwar Pujara (Rs 50 lakh), Harishankar Reddy (Rs 20 lakh), Bhagath Varma (Rs 20 lakh), Hari Nishanth (Rs 20 lakh).

Boxam International: Satisho Ashish na Semi-final-i iogo

Castellon, Metsüremi/March 05, 2021 (Agencies): Castellon, Spain nung tang asaya aliba 35th Boxam International Tournament nung Olympic atema teimla alir India nung boxer Satish Kumar (+91kg) aser Ashish Kumar (75kg) nati pei pei tata asaya nung takok ngua semifinal-i iogo.

Kasa asayamung nung, külem India nung Sumit Sangwan (81kg)-i Belgium nung Mohor El Ziad madak 4-1 agi takok anguba sülen pa-a last-four stage tongtetogo.

2012 London Olympic asayamung nung bronze medal angusang, Vikas Krishan-a semifinal tongogo. Tebur 69kg category tetoktepba nung Vikas-i Italy nunger Vincenzo Mangiacapre madake 3-2 agi takok angu.

Brehostibarnü, India nungi super heavyweight nung Olympic atema mezüng qualify asüsang Satish-i last-eight bout nung Denmark nunger Givskov Nielsen madak 5-0 agi takok angu. Ano külen, medal round tongtetstü atema Asian silver medal angusang Ashish-i Italy nunger Remo Salvatti madak 4-

1 verdict agi akok.

Par asemi takok anguba densema, tan asayamung nung India nung boxer 10 tashi semi-final tongteta lir. Semi final tongteter India boxer rongnung tebur 6 aser tetsür pezü alitsü.

Kasa anogo, Mohammed Hussamuddin (57kg) den Tokyo nung shilem agitsü renema alir Manish Kaushik (63kg) aser Vikas Krishan (69kg) nungeri pei pei tata asaya koka semi-final tongogo.

Ajisüaka, world no. 1 Amit Panghal (52kg) tia makai European Games gold-medal angusang Gabriel Escobar-i tsükdaktsü.

Tetsür rongnung, trokben tashi world champion world champion M C Mary Kom (51kg), Asian champion Pooja Rani (75kg), Simranjit Kaur (60kg) aser mezüng shilem agila Jasmine (57kg) nung last-four stage tongteta lir.

35buba Boxam International Tournament nung Russia, USA, Italy aser Kazakhstan densema linük 17 nungi boxer 17 agi shilem agidar.

BILEMDANGANG

"Tetenzükdang aibelenra tatem matonger."